

## 2 TIMOTI

<sup>1</sup> E Pol. Kristus Yesus na e qarınbej deqa e aqa anjam mare mare laqnum. Qotei aqa segi areqalo na e wau di ebej deqa e na tamo unğasari nanđi endegsi minjreqnum, “Ninđi Kristus Yesus qa nunđo areqalo sinđilatqab di ninđi nambile oqab.” Nambile di Qotei a nami iga egwa marej.

<sup>2</sup> O Timoti, ni ijo anđro bole bulonum. E anjam endi nenđrenyosim inoq qarınyonum. Tamo Koba Kristus Yesus aqa Abu Qotei wo nanđi aiyel ni qa dulosis are boleınjrimqa ni lawo na soqnime.

### *Iga Yesus aqa anjam bole qa jemaigwasai*

<sup>3</sup> Ijo moma nanđi nami Qotei aqa wau ojoqneb dego kere e bini Qotei aqa wau ojeqnum. Ijo moma nanđo are miligiq di nanđi qalieeb, nanđi Qotei aqa nıangalaq di une saıqoji soqneb. E segi dego ijo are miligiq di degsi qalieonum. Deqa Timoti, e qolo ti qanam ti Qotei pailyoqnsim ni qa are qaloqnsim Qotei binıyeqnum.

<sup>4</sup> Nami e ni uratmqa laqnamqa ni e qa are ugeimonaqa akamem. E deqa are qaloqnsim ni olo numqajqa are koba unu. E ni numsiyqa tulan areboleboleibqas.

<sup>5</sup> Nami ino moma Lois wo ino ai Yunis wo nanđi aiyel Yesus qa nanđo areqalo sinđilatoqneb dego kere bini ni Yesus qa ino areqalo sinđilateqnum. Utru deqa e ni numqajqa are qaloqnsim unum.

<sup>6</sup> Nami e ijo ban ino gateq di atnamqa Qotei na ni aqa wau ojıajqa deqa sinđila emej. Deqa e ino areqalo tigeltetmitqa ni sinđila deqa olo are

qaloqnsim wau di singilatoqne. Tamo a nam puyim puloŋosim kobaqas dego kere ni ino wau di olo singilatim kobaqas.

<sup>7</sup> Ni qalie, Qotei na iga ulaqajqa deqa aqa Mondor egosai. Iga singila ti qalaqalaiyo kumbra ti areqalo bole ti sqajqa deqa osiq aqa Mondor egej.

<sup>8</sup> Deqa ni gago Tamo Koba aqa anjam qa jemaimaiq. Ni e qa dego jemaimaiq. E Yesus aqa anjam mare mare laqnem deqa jeu tamo nanŋi na e ojsib tonto talq endi waibeb unum. Deqa ni na e beterbosim Qotei aqa singila ti sosim Yesus aqa anjam bole mare mare laqne. Osim dena ni e ombla gulbe oqnsim sqom.

<sup>9</sup> Qotei na iga elenosiqa iga aqa segi kumbra boleq di sqajqa deqa are qalsiq metgej. Iga wau bole bole yoqnem Qotei a deqa osiq iga metgosai. Tulaŋ nami a inŋi inŋi kalil atosaisosiqa a aqa segi areqalo na iga metgej. Osiqa iga qa are boleiyosiqa Kristus Yesus qarinyosiq dena iga elenej.

<sup>10</sup> Bati kereonaqa Kristus Yesus agi iga elenej qaji a boleq dosiqa moiyo aqa singila kobotej. Aqa kumbra dena Qotei a iga qa are boleiyej. E Yesus aqa anjam bole mare mare laqnum gam dena tamo ungasari nanŋi endegsi poinjreŋnu, “Bole, iga moiqasai. Iga nambile gaigai sqom.”

<sup>11</sup> E Yesus aqa anjam bole palontqajqa ti plaltqajqa ti deqa Qotei na e giltbej.

<sup>12</sup> Deqa unŋum, e gulbe oqnsiy sqai. E deqa jemaibqasai. E Yesus qa ijo areqalo singilateqnum. E a qa qalie bole. A e wau ebej deqa e qalieonum, a na wau di geregere taqatoqnsim gilsim a olo bqajqa bati brantqas.

<sup>13</sup> O Timoti, anjam bole kalil e nami ni mermoqnem qaji di ni geregere dauryoqnsim palontoqne. Osim Kristus Yesus qa ino areqalo singilatoqnsim a qalaqalaiyoqne.

<sup>14</sup> Qotei na aqa anjam bole di ino banq di atej. Anjam di tulañ bolequja. Deqa ni anjam di geregere taqatesoqne. Mondor Bole agi gago are miligiq di unu qaji a na ni aqaryaimoqnimqa ni Qotei aqa wau geregere ojsim laqne.

<sup>15</sup> Ni qalie, tamo kalil Esia sawaq di unub qaji nanqi e uratbosib jaraiyeb. Figelus Hermogenes wo nanqi aiyel dego e uratbosib jaraiyeb.

<sup>16</sup> E endegsi pailyeqnum, “O Tamo Koba, ni Onesiforus aqa tal qujai nanqi qa dulame.” O Timoti, Onesiforus a bati gargekoba ijo are boletetboqnej. E tonto talq di soqnem bati deqa a e qa jemaiyosai.

<sup>17</sup> A Rom qureq bosiq dia e qa namosiq itbej.

<sup>18</sup> Deqa e a qa endegsi pailyeqnum, “O Tamo Koba, mondonñ ni na tamo ungasari nanqi peginjrqa batiamqa ni Onesiforus a qa dulame.” O Timoti, nami Efesus qureq di dego Onesiforus a e qa wau gargekoba yoqnsiqa aqaryaiboqnej. Di ni qalie.

## 2

*Pol na Timoti minjej, “Ni Yesus aqa qoto tamo bulosim gulbe qoboiyesoqne”*

<sup>1</sup> O ijo angro Timoti, Kristus Yesus a iga qa are boleiyeqnu aqa kumbra dena ni singilatmoqneme.

<sup>2</sup> E tamo gargekoba nanqo namgalaq di Qotei aqa anjam palontoqnem di ni quoqnem. Anjam di ni na olo tamo qudei Yesus bole dauryeqnub

qaji nanġi dego minjroqnimqa nanġi kamba tamo qudei nanġi minjroqnaqab.

<sup>3</sup> Ni e ombla Kristus Yesus aqa qoto tamo bulosim gulbe qoboyesoqne.

<sup>4</sup> Qoto tamo nanġo kumbra di ni qalie. Nanġi qotqajqa wau ojoqnsib olo wau bei qa are qalo-saieqnu. Nanġi qotqajqa wau segi ojeqnu. Deqa nanġo gate a nanġi qa tulaŋ areboleboleiyeqnu.

<sup>5</sup> Tamo bei bei wo gurgurosib bubuŋosib bei na bei buŋyosim di a awai oqas. A ururqajqa kumbra gegerere dauryqasai di a awai oqasai.

<sup>6</sup> Tamo bei a wauosim inġi yagwas di inġi meliamqa a osim uyqas. Deqa tamo lanaj bei a namoqna bosim inġi uyqasai.

<sup>7</sup> O Timoti, ijo anjam e ni mermeqnum qaji endi ni qusim ino areqaloq di sinġilatime. Yimqa Tamo Koba a na powo emimqa ni ijo anjam kalil endi gegerere poimqas.

<sup>8-9</sup> Ni gaigai Yesus Kristus qa are qaloqne. A moisiq olo subq na tigelej. A Mandor Koba Devit aqa moma. E aqa anjam bole palontoqnsim laqnam jeu tamo nanġi na e tamo uge bul nuboqnsib gulbe koba eboqneb. Deqa nanġi na e ojsib tonto talq endi waibeb unum. Ariya nanġi Qotei aqa anjam getentqa keresai.

<sup>10</sup> E tamo unġasari Qotei na giltnjrej qaji nanġi qa are qaloqnsim gulbe kalil qoboyeqnum. E degyeqnum. Di kiyafa? Qotei na nanġi elenjamqa nanġi Kristus Yesus aqa ñam na nambile osib a ombla so bole gaigai sqajqa deqa.

<sup>11</sup> Qotei aqa anjam bei unu. Anjam di gisaŋ sai. Anjam di bole. Deqa iga gago areqaloq di

siŋgilatqa kere. Anjam agiende.

“Iga Yesus ombla moiyoqnsim deqa iga a ombla olo ŋambile gaigai sqom.

<sup>12</sup> Iga gulbe kalil qoboioqnsim siŋgila na tigel-sqom di mondoŋ iga Yesus ombla mandor kokba sqom.

Iga a qoreiyqom di a na kamba iga qoreigwas.

<sup>13</sup> Iga aqa anjam dauryqa marsimqa olo dauryqa uratqom di Yesus a segi aqa anjam uratqa keresai. A dauryoqnsim sqas.”

*Pol na Timoti minjej, “Ni Qotei aqa wau tamo bole soqne”*

<sup>14</sup> O Timoti, Kristen nanŋi ijo anjam deqa are walnŋraim deqa ni na gaigai minjroqne. Osim Qotei aqa ŋamgalaq di nanŋi endegsim minjroqne, “Niŋgi anjam qudei qa laŋa laŋa ŋiriŋoqnaib. Osib ŋam qudei qa anjam na qotoqnaib. Anjam dena niŋgi aqaryaiŋgwa keresai. Niŋgi anjam di qusib dauryqab di nunŋo areqalo niŋaqesqas.”

<sup>15</sup> O Timoti, ni Qotei aqa wau tamo boledamu sosimqa aqa anjam bole geregere palontoqnaqnaqna siŋgilaoqne. Yim Qotei a ino wau kalil qa tulaŋ arearetoqnaqas. Deqa ni aqa ŋamgalaq di jemaimqasai.

<sup>16</sup> Tamo qudei nanŋi anjam uge laŋa laŋa mareleŋeqnub deqa ni nanŋo anjam di qoreiye. Nanŋo anjam di tulaŋ ugedamu. Anjam dena tamo unŋasari nanŋi are prugtetnŋroqnm nanŋi Qotei aqa kumbra torei uratoqnaqab.

<sup>17</sup> Anjam di yu uge bulosim tulaŋ kobaqujaosim tamo unŋasari nanŋi ugeugeinŋroqnaqas. Tamo

aiyel anjam uge deqaji mareqnub agi Himeneus Filetus wo.

<sup>18</sup> Nanği aiyel anjam bole qa gam uratosib gisañ anjam endegsib mareqnub, “Tamo unğasari kalil nanği nami subq na tigeleb koboej. Deqa nanği olo bunuqna subq na tigelqasai.” O Timoti, gisañ anjam dena tamo unğasari qudei nami Yesus qa nanğo areqalo siñgilateb qaji nanğo areqalo olo niñaqyetnjreqnu.

<sup>19</sup> Qotei aqa segi tamo unğasari nanği tal ai bu-losib siñgila na tigelejunub. Tal aiq di Qotei aqa anjam endegsib nenğrenyeb unu, “Tamo Koba a aqa segi tamo unğasari nanği qa qalie bole.” Anjam bei dego tal aiq di nenğrenyeb unu, “Tamo kalil Tamo Koba aqa ñam ejunub qaji nanği kumbra uge uge qoreiyebe.”

<sup>20</sup> E yawo anjam bei mermqai. Tal kobaquja bei miligiq di tabir qudei gol na ti silva na ti gereiyeb. Tabir qudei ñamtañ na gereiyeb. Tabir qudei jagi na gereiyeb. Tabir qudei wau bole qa gereiyosib olo tabir qudei wau kiñilala qa gereiyeb.

<sup>21</sup> Deqa tamo bei a kumbra uge kalil uratosim Qotei aqa ñamgalaq di une saiqoji sqas di a tabir wau bole qa gereiyeb qaji di bul sqas. Deqa a ñam bole osim Qotei aqa segi kumbra boleq di sosim Gate Koba Yesus geregere wauetoqnqas. A wau bole kalil yoqnqajqa tulañ kere na sqas.

<sup>22</sup> Deqa Timoti, areqalo uge uge anğro wala nanği dauryeqnub qaji di ni na qoreiye. Osim ni kumbra bole yoqnqajqa wauoqnsim Qotei qa ino areqalo siñgilatoqnsim tamo unğasari nanği qalaqalainjroqnsim lawo na soqne. Tamo unğasari

are bole ti sosib Tamo Koba aqa ñam na pailye-  
qñub qaji nanği ni ombla kumbra kalil di yoqñiy.

<sup>23</sup> Tamo unğasari areqalo bole ti sosai qaji nanği nanari anjam laña laña mareleñeqñub deqa ni nanğo anjam di quoqnaim. Ni qalie, anjam dena qoto ti ñirinğ ti tigelteqnu.

<sup>24</sup> Tamo Koba aqa wau tamo nanği anjam na qotoqñsib ñirinğqñai. Nanği na tamo unğasari kalil nanği kumbra bole bole enjroqñsib Qotei aqa anjam plaltosib minjroqñebe. Tamo qudei na nanği gulbe enjribqa nanği deqa ñirinğai. Nanği kamba olo kumbra lawo nanği osornjroqñebe.

<sup>25</sup> Nanği lawo na Qotei aqa anjam gotranğo qaji tamo nanğo areqalo olo gereiyetnjroqñebe. Yim Qotei na nanğo are bulyetnjrimqa nanği aqa anjam bole poinjrim dauryqab.

<sup>26</sup> Nami Satan a tamo nanği di singila na ojeson-aqa nanği aqa anjam dauryoqñeb. Deqa Qotei aqa wau tamo nanği lawo na nanği tingitnjribqa nanği Qotei aqa anjam bole qa poinjrim olo areqalo bole osib Satan aqa bañq dena jaraiyosib sawa boleq di sqab.

### 3

*Diño bati jojomoqñimqa tamo nanği kumbra uge uge yoqñqab*

<sup>1</sup> O Timoti, ni endegsi poimem. Mondonğ diño bati jojomoqñimqa gulbe gargekoba mandamq endi brantelenğqab.

<sup>2</sup> Tamo nanği kumbra uge uge endeqaji yoqñqab. Nanği nanğo segi jejamu qa tulañ areboleboleinjroqñqas. Nanği silali koba oqajqa

are prugnjqroqnas. Nanqi nanqo segi ñam soqtoqnsib diqoqnsib ñirin anjam koba maroqnsib tamo nanqi misilinjqroqnaqab. Nanqi nanqo ai abu nanqo anjam gotranjqoqnaqab. Tamo qudei na nanqi aqaryainjqroqnaqab nanqi kamba olo nanqi qa are boleinqroqnaqasai. Nanqi Qotei aqa kumbra bole kalil qoreiyjqoqnaqab.

<sup>3</sup> Nanqi qalaqalaiyo kumbra dauryqa uratoqnaqab. Nanqi ñirinjqoqnsib jeu atoqnsib olo jeu turyoqnaqasai. Nanqi yomu anjam gargekoba maroqnsib nanqo segi jeyamu taqatqajqa asginjqroqnas. Nanqi laña laña qotoqnsibqa tamo nanqi ñumoqnsib kumbra bole jeutoqnaqab.

<sup>4</sup> Nanqi tamo qudei nanqi ugeugeinqroqnaqab. Nanqi urur kumbra uge uge yoqnaqab. Nanqi kumbra di yqajqa ulaoqnaqasai. Nanqi nanqo segi ñam soqtoqnsib mandam qa inqi inqi qa tulañ areboleboleinqroqnas. Nanqi Qotei qa yala arearetnjqroqnaqasai.

<sup>5</sup> Nanqi laña babañ na Qotei aqa kumbra bole dauryobuloqnsib sqab. Kumbra bole aqa siñgila nanqi yala poinjqrasai. O Timoti, tamo deqaji brantqoqnaqab ni na nanqi beternjqraim. Torei uratnjqsim isaq gile.

<sup>6</sup> Tamo deqaji nanqi kumbra uge endegyeqnaqab. Nanqi uña qudei nanqo tal miligiq giloqnsib nanqi walawalainjqroqnsib areqalo titetnjqreqnaqab. Uña nanqi di areqalo bole ti sosai. Nanqi une gargekoba yeqnaqab nanqo une dena nanqi siñgila na ojeqnaqab nanqi kumbra uge uge yqajqa are prugnjqreqnu.

<sup>7</sup> Uña nanqi di gaigai qalie oqajqa are qaloqnsib ariya nanqi anjam bole aqa utru poinjqra keresai-



injreqnu.

<sup>8</sup> Gisaŋ tamo naŋgi di Qotei qa naŋgo areqalo siŋgilatosaieqnu. Naŋgo areqalo tulaŋ niñaqejunu. Nami Janes Jambres wo naŋgi aiyel Moses jeutoqneb dego kere gisaŋ tamo naŋgi na Qotei aqa anjam bole jeuteqnu.

<sup>9</sup> Ariya naŋgo kumbra di tulaŋ kobaqasai. Nami Janes Jambres wo naŋgi aiyel kumbra deqaji yeqnabqa tamo uŋgasari kalil naŋgi unoqnsib maroqneb, “Naŋgo kumbra di nanari.” Dego kere gisaŋ tamo naŋgi kumbra uge uge yoqniqqa tamo uŋgasari kalil naŋgi unoqnsib maroqnaqab, “Naŋgo kumbra di nanari.”

*Pol na Timoti minjej, “Ni Qotei aqa anjam siŋgila na ojesoqne”*

<sup>10</sup> O Timoti, ni nami e ombla soqnem deqa ijo anjam kalil e na plaltoqnem qaji di ni qalie. Ijo walwel ti ijo kumbra ti di ni qalie bole. E Qotei qa ijo areqalo siŋgilatoqnsim ijo are miligi dego gaigai siŋgilatoqnsim waukobaoqnem. Osim tamo uŋgasari naŋgi qalaqalainjroqnsim siŋgila na tigeloqnsim gulbe qoboioqnem. Di ni qalie bole.

<sup>11</sup> Antiok qure ti Aikoniam qure ti Listra qure ti dia jeu tamo naŋgi na e kumbra uge uge ebeqnaqqa e jaqatiŋ koba oqnem. Qure qureq di kumbra uge kalil e qa brantoqnej qaji di ni qalie. Ariya bati deqa Tamo Koba a na e aqaryaiboqnsiqa gulbe kalilq dena e oqnsiq taqal atoqnej. Deqa bini e bole unum.

<sup>12</sup> Ni qalie, jeu tamo naŋgi na tamo uŋgasari kalil Kristus Yesus beteryesosib Qotei aqa kumbra dau-ryqa siŋgilaeqnu qaji naŋgi ugeugeinjqnaqab.

<sup>13</sup> Tamo uge uge nanġi ti gisaŋ tamo nanġi ti tulaŋ ugeoqnqab. Ugeoqnsib gisaŋ anjam gargekoba maroqnib Satan na kamba dego nanġi olo gisa gisaŋjroqnqas. Yim nanġo kumbra di tulaŋ ugedamuqas.

<sup>14</sup> Ariya Timoti, anjam iga nami ni mermonam qusim ino areqaloq di siŋgilatem qaji di ni olo siŋgila na ojesoqne. Ni iga qa bole qalieonum deqa ni degyoqne.

<sup>15</sup> Nami ni anġro kiñala sosimqa ni Qotei aqa anjam nenġrenq di so qaji di qalieosim bosibosim agi qalieosim unum. Anjam dena ni powo bole emon-aqa ni Kristus Yesus qa ino areqalo siŋgilatonamqa Qotei na ni padalo sawaq dena ej.

<sup>16</sup> Qotei aqa anjam kalil nenġrenq di so qaji di Mondor a segi na babtej. Anjam dena iga aqaryaigoqnsiqa gam bole osorgoqnsiqa gago areqalo tingitetgeqnu. Osiqa gago walwel gereiyetgoqnsiqa iga kumbra bole dauryqajqa siŋgilatgeqnu.

<sup>17</sup> Deqa anjam dena Qotei aqa tamo unġasari nanġi keretnjreqnaqa nanġi kumbra bole kalil yoqnsib wau bole bole ojeqnu.

## 4

*Pol na Timoti minnej, “Ni Yesus aqa anjam palon-tqajqa tulaŋ siŋgilaoqne”*

<sup>1</sup> Qotei aqa Njiri Kristus Yesus wo nanġo njanġalaq di e ni siŋgila na endegsi mermqai. Mondon Yesus a laŋ qureq na brantosim tamo unġasari kalil njanbible so qaji nanġi ti nami morenejeb qaji nanġi ti peginjrqas. Osim a bati gaigai Mandor Koba sqas.

<sup>2</sup> Deqa ni Yesus aqa anjam palontoqne. Tamo ungasari nanngi ino anjam quqwa arearetnjroqngas kiyo asginjroqngas kiyo di unqum. Ni na nanngi tingitnjroqnsim dalnjroqnsim are tigeltetnjroqne. Ni asgimaiq.

<sup>3</sup> O Timoti, ni que. Bunuqna tamo gargekoba nanngi Qotei aqa anjam quqwa asginjroqnmqa olo anjam utru bei bei quqwajqa are prugnjroqngas. Osib nanngo segi areqalo dauryosib anjam plalto tamo qudei nanngi metnjroqrib bosib gisanj anjam minjroqrib qusib arearetnjroqngas.

<sup>4</sup> Deqa nanngi anjam bole quqwa uratosib lanja sa anjam quqwajqa dab atoqngab.

<sup>5</sup> Ariya Timoti, ni kumbra degyaim. Ni gaigai areqalo bole na sosimqa gulbe ti jaqatinj ti qoboiyoqne. Osim ni na Yesus aqa anjam bole tamo ungasari nanngi minjre minjre laqne. Ni nanngi aqaryainjrqaajqa wau ti unum deqa ni wau di keretosim yoqne.

### *Pol a moiqa bati jojomej*

<sup>6</sup> Ni qalie, jeu tamo nanngi na e lubsib moiyoqbqa bati jojomqo. Israel nanngi wain bilentoqnsib Qotei atraiyeqnuq dego kere e moisiyqa ijo leq aiqas qaji dena Qotei atraiyobulqai.

<sup>7</sup> Tamo nanngi gurguroqnsib bubuqnuq dego kere e nami sinqila na ururosime Yesus dauryoqnem agi bini e degyeqnum. E ijo wau kalil kobotonum. E Qotei qa ijo areqalo sinqilatoqnem di e uratosaiqnem. Agi bini e ijo areqalo di sinqila na ojejunum.

<sup>8</sup> Tamo nanngi gurguroqnsib bubuqnuq di nanngi awai oqajqa. Ijo awai bole agi Qotei a lanj

qureq di atej unu. E awai di oqajqa tariñoqnsim unum. Ijo awai agiende. Mondonj Tamo Koba a na e tamo bole une saiwoji qa merbqas. Di ijo awai bole. Tamo Koba a kumbra bole tintinj na tamo ungasari nanji peginjrqas. Peginjrqas bati deqa a awai bole di e ebqas. A e segi awai ebqasai. Tamo kalil Yesus a lanj goge na brantim unqajqa deqa areboleboleinjreqnu qaji nanji dego awai bole enjrqas.

*Pol na Timoti minjej, “Ni ijoq urur au”*

<sup>9</sup> O Timoti, ni ijoq urur au.

<sup>10</sup> Ni que. Demas a mandam endeqa kumbra qa tulanj areareteqnu. Deqa a na e uratbosiqa Tesalonaika qureq gilej. Kresens a Galesia sawaq gilej. Taitus a Dalmesia sawaq gilej.

<sup>11</sup> Aqo Luk wo segi unum. Deqa ni Mak osimqa endeq boiy. Mak a tamo bole. A na e aqaryaiboqnsiqa wau bole yeqnu.

<sup>12</sup> Tikikus agi e na qarinyonam Efesus qureq aiyej.

<sup>13</sup> Ni ijoq bqa osimqa ijo gara jugo Troas qureq di uratem qaji di osim osau. Agi Karpus aqa talq di uratem unu. Ijo buk qudei dego osau. Ariya ijo pepa lulumo qudei wagme nanjo jegara na gereiyo qaji di dego osim osbetbe. Ni are walmaiq.

<sup>14</sup> Bras na inji inji gereiyo tamo aqa ñam Aleksander a na e ugeugeiboqnej. Deqa mondonj Tamo Koba a na kamba Aleksander ñolawotqas.

<sup>15</sup> Aleksander a nami iga jeutgoqnsiqa gago anjam tulanj ugeugeiyoqnej. Deqa ni a qa geregere ñam atoqne.

<sup>16</sup> JEU tamo nanġi nami e ojsib anjam pegiyo talq di tigeltbeb bati deqa tamo bei na e taqbosai. Tamo kalil nanġi e uratbosib jaraiyeb. Deqa e Qotei endegsi pailyem, “O Abu, ni nanġo une deqa olo kambatnjraime.” E degsi Qotei pailyem.

<sup>17</sup> Ariya Tamo Koba Yesus a segi na e taqbosiqa sinġila ebej deqa e anjam pegiyo talq di tigelosim Yesus aqa anjam bole mareqnamqa sawa bei bei qaji nanġi quoqneb. Qotei na e aqaryai-bosiqa baun juwan nanġo medabuq na e osiq taqal waibej.

<sup>18</sup> Deqa e endegsi qalieonum. JEU tamo nanġi boqnsib kumbra uge uge ebqa maroqneb Qotei na e aqaryaiboqnsim nanġo banq dena e oqnsim taqal waiboqngas. Osim bunuqna a na e lan qureq osi oqsim dia e taqatbosim ijo Mandor Koba sqas. Deqa iga bati gaigai aqa ñam soqtoqngom. Bole.

<sup>19</sup> O Timoti, ni na ijo kaiye anjam endi osim tamo nanġi Onesiforus aqa talq di unub qaji nanġi ti Prisila Akwila wo nanġi koba na minjime.

<sup>20</sup> Erastus a Korin qureq di unu. Trofimus a Miletus qureq di ma ti sonaq e na uratem unu.

<sup>21</sup> Ni ijoq urur boqujat. Ni tariñoqnim ulili bati bo uge.

Yubulus na Pudens na Linus na Klodia na nanġi qolqe Kristen tamo kalil nanġi ti koba na kaiye anjam endi inoq qariñyonub.

<sup>22</sup> Tamo Koba a na ino qunun geregere taqateme. Osim niñgi kalil qa are boleiyeme. Bole.

**Yesus Aqa Anjam Bole 2000**  
**The New Testament in the Anjam language of Papua**  
**New Guinea, 2000 edition**  
**Nupela Testamen long tokples Anjam long Niugini,**  
**2000**

Copyright © 2000 The Bible Society of Papua New Guinea

Language: Anjam

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2001-01-01

---

PDF generated using Haiola and XeLaTeX on 28 Dec 2024 from source files dated 31 Aug 2023

6bd977a8-0139-583b-a367-c04faf6223cc